

eiusmodi consequeretur, quae ordini nostro, aliisque peritis artis aestimatoribus probaretur. Quae quidem ne forte cupidius quam verius dixisse videamur, de vitae ac studiorum Eius ratione breuiter exponemus, vnde appareat, quibus et praeceptis et institutis adiutus, ad doctrinam, summis apud nos honoribus dignam, adspiraverit.

Scilicet natus est Clarissimus Candidatus Mitweidae, anno huius seculi vndequinquagesimo, die decimo octavo mensis Nouembris, patre vsus HAVBOLDO ERDMANNO, saltuariorum praefecto Regio-Electorali, praematura morte ipsi erepto, matre vero ELEONORA CHARLOTTA, e gente FRÖLICHIA, quam adhuc superstitem pie veneratur. Hi igitur parentes fidelissimi, quanquam nihil prius et antiquius habebant, quam vt filium honeste educarent, et vtilissimis rebus instruendum curarent, tamen haec illorum cura plurimum retardabatur natiua contorsione vtriusque pedis extremi, qua ipse laborabat, cuiusque molestiis grauissima disciplinae puerili impedimenta obiici sentiebat. Sed per summam beneficentiam D. REGINAE, MARIAE IOSEPHAE, sumtus curationis indulgentissime suppeditantis, itemque per prudentiam et curam b. MANDANI et Excell. PITSCHELII effectum est, vt intra biennium saluus restitueretur, cuius beneficii gratissimam semper memoriam apud se fore pollicetur. Hinc itaque vsu pedum donatus, vitaeque adeo ipsius fructum adeptus in scholam patriam deductus est, vbi ex Magistris idoneis, WISNERO, HOFFMANNO, SCHVLZIO et MARTINO, necessaria religionis et literarum praecepta didicit. Quibus duobus cum fundamenta doctrinae non contemnenda iecisset, anno sexagesimo tertio Dresdam abiit, commendatus

datus